

# **Ya hulat ni apostol Pablo kanlan ampaniwala kan Apo Jesu-Cristo ha Galacia**

## *Paunan habi*

Hêñ intoro ya Mangêd ya Habi tungkol kan Apo Jesu-Cristo kanlan alwan Israelita, ay tinanggap la ya habayto, noa, nilumtaw ya kotang no dapat lan honolên ya Kautuhan ya impahulat ni Apo Namalyari kan apo Moises. Bayro kanlan ampaniwala ha Galacia, ya mihay probinsyan Roma ha Asia Menor, ay main nilumatêng ya ampanoro hêñ kailangan honolên ya Kautuhan ni apo Moises bayo mag-in mangêd ha hêlêk ni Apo Namalyari. Labay ni apostol Pablo di ha hulat na kanlan taga-Galacia, ay paorongên hila ha pêtêg ya paniwala, ta nitama hilay na bayro ha alwan pêtêg ya toro.

Hinulat ni apostol Pablo di, ya hilay tawo ay mag-in mangêd ha hêlêk ni Apo Namalyari gawan ha paniwala la kan Apo Jesu-Cristo, alwan gawan ha pamanhumonol la ha Kautuhan.

Kabooan hêñ pinakalaman

Umpisan hulat 1:1-10

Ya pangaapostol ni apostol Pablo 1:11-2:21

No ay-êmêñ mag-in mangêd ha hêlêk ni Apo Namalyari 3:1-4:31

Paan mag-orong ha pangaipoh 5:1-26

Dapat miyahawop 6:1-10

Tawlin habi 6:11-18

<sup>1</sup> Hiko hi Pablo ya mihay apostol, ya in-utoh ni Apo Namalyari. Alwan tawo ya namili hēn nangiutoh kangko, ta ya nangiutoh kangko, ay hi Apo Jesu-Cristo, haka ya Tatang na, hi Apo Namalyari, ya namabiyay kanan oman.

<sup>2</sup> Hilay kalamo ko di, ya patêl ha Panginoon, ay kalamo ko hēn ampangumusta kamoyun patêl ha Panginoon ya angkapi-tsi-tsipon bahêh ha probinsyan Galacia.

<sup>3</sup> An-ihalangin naêñ kaw ya dyanan kaw dayi hēn kapatêkbêkan nakêm, haka ingalwan kaw dayi ni Apo Namalyari ya Tatang tamo, haka Panginoon Jesu-Cristo.

<sup>4</sup> Ha kalabaynan Tatang tamo, hi Apo Namalyari, ay indin ni Apo Jesu-Cristo ya lawini na hēn matsi, gawan ha kasalanan tamo, ta êmêñ kitamo miligtas haka midayo ha kaganawan nangarawak ya angkalyari amêhêñ di ha luta.

<sup>5</sup> Puriêñ hi Apo Namalyari hēn angga-angga. Amen.

### *Ya pêtêg ya toro ya tungkol kan Apo Jesu-Cristo*

<sup>6</sup> Hi Apo Namalyari ya nanagyat kamoyu, gawan ha ayn kapantag ya ingalo ni Apo Jesu-Cristo. Ampag-êpapah ako kamoyu ta nataluh yo yan tinalibatokan ta nagtugigih kaw ha alwan pêtêg ya toro.

<sup>7</sup> Ya Mangêd ya Habi, ya miligtas kitamo gawan ha paniwala tamo kan Apo Jesu-Cristo, ay ahina maioman. Noa, main ampanggulo hēn ihip yo ta labay lan itumbalik ya habayto ya kaptêgan.

<sup>8</sup> Main man anghel ya ubat ha langit, o miha kannaêñ man, ya ampamitoro hēn halanghang ha

intoro naêñ kamoyu, ay parusaan ya dayi ni Apo Namalyari ha impiyerno.

<sup>9</sup> Omanêñ kina êt habiêñ kamoyu ya habaytoy hinabi naêñ haton bayri, no main mamitoro kamoyu hên kaatag ya toro ha tinanggap yoy nay toro, ay parusaan ya dayi ni Apo Namalyari ha impiyerno.

<sup>10</sup> Hino ya mahabi yo ha an-ipamwang ko? Kapareho ko, o hi Apo Namalyari ya labay kon pahiglaêñ? Kayno êndat yo no hikoy ampanapol êt hên pamandayêw hên tawo, hên nanad ha mana kon andaygên. No ampanapol akon pamandayêw hên tawo, ay alwa kon tagahuyo ni Apo Jesu-Cristo.

### *No ay-êmêñ nag-in apostol hi Pablo*

<sup>11</sup> Patêl ko, labay kon mamwangan yo ya Mangêd ya Habi ya impamwang ko kamoyu, ay alwan ubat ha kaihipan tawo.

<sup>12</sup> Alwan tawo ya namidaoh o namitoro hên habayto kangko, noa, hi Apo Jesu-Cristo ya nampamwang hên habayto kangko.

<sup>13</sup> Kayno nabalitaan yo kina no ay-êmêñ ya biyay ko hên haton bayri ha pamanhumonol ko ha paniwala naêñ hên Israelita. Hêñ hato ay haday pamairap ko kanlan ampaniwala kan Apo Jesu-Cristo, ta labay kon ubuhêñ hilan patsêñ.

<sup>14</sup> Ha kal-atan naêñ Israelita ya kapareho kon edad ay hiko ya pinakamahipêg ha pamanhumonol ha kaugalian hên ninuno naêñ.

<sup>15</sup> Noa, gawan ha ayn kapantag ya ingalo ni Apo Namalyari, ay pinili na kina hêñ hato êt, bayo ko in-anak, ta daygêñ na kon tagahuyo na.

**16** Kabay hêñ impamwang na kangko ya Anak na ya hi Apo Jesu-Cristo, ta êmêñ ko ya itoro kamoyun alwan Israelita, ay hinonol ko yan tampol hêñ a kina nakikwa hêñ payo ha hinoman ya tawo.

**17** Haka a ko nilumakat ha balayan Jerusalem hêñ nagpatoro kanlan nuna kangkon nag-in apostol. Noa, nagtagloh ako ha legal ya marayo ha tawo ha bansan Arabia. Hêñ pinag-aralan koy kahulatan ni Apo Namalyari bayro, ay nag-orong ako ha balayan Damasco.

**18** Pangayari hêñ tatloy taon ay nilumakat ako ha balayan Jerusalem hêñ nakibalay kan Pedro. Nilaêñ ako bayro kana hêñ labinlimay allo.

**19** Ayn akon nahêlêk bayro ya kaatag ya apostol no alwan bêngat hi Santiago ya ali ni Apo Jesu-Cristo.

**20** Pêtêg ya an-ihulat ko kamoyu. A ko ampaglaram. Muwang ni Apo Namalyari.

**21** Pangayari hêñ habayto ay nammita ko ha probinsyan Siria haka Cilicia.

**22** A la ko êt mantêg muwang hêñ hilay patêl ha Panginoon ya angkapi-tsi-tsipon ha probinsyan Judea.

**23** Nagilam lan bêngat ha kaatag ya ampaghabi ya wanla, “Ya ampamairap kantamo pon haton bayri, ay ampamitoroy na amêhêñ, hêñ tungkol ha paniwala kan Panginoon Jesu-Cristo, ya paniwala ya labay nan hiraêñ hêñ haton allo.”

**24** Pinuri la hi Apo Namalyari gawan ha nalyari kangko, ya no ay-êmêñ akon nagkamain hêñ paniwala ya nanad kanla.

## 2

*Naniraw ana êt hi apostol Pablo ha Jerusalem*

<sup>1</sup> Pangayari hên labin-apat ya taon ay nilumakat kina êt ha balayan Jerusalem. Kalamo ko hi Bernabe haka pinakilako ko êt hi Tito.

<sup>2</sup> Nilumakat kina êt bayro ta impaihip kangko ni Apo Namalyari ya dapat kon maniraw bayro kanlan ampamaala kanlan patêl ha Panginoon ya angkapi-tsi-tsipon. Kanlan ampamaala bêngat, ay impalinaw ko ya an-itoro\* ko kamoyun alwan Israelita. Impamwang koy habayto, ta a ko labay ya mag-in ayn alagá, ya pagal ko hên hato angga amêhêñ.

<sup>3</sup> Nakiuyon hila etaman ha impamulah ko ta a la impatuli hi Tito ya kalamo ko, Griego ya man ya a pon tinuli.

<sup>4</sup> Noa, ya nalyari ay main nakilamo bayro hên ungnoy kaparehon Israelita ya waringan ampaniwala kan Apo Jesu-Cristo, ta labay la kay hên imatonan gawan ayn kitamina ha aypa lan Kautuhan ni apo Moises gawan main kitaminan pamakim-ihä kan Apo Jesu-Cristo. Labay lan pahonolêñ la kitamo pon bayro ha Kautuhan hên nanad hên ipoh.

<sup>5</sup> Noa, pêrad man, ay a kay nakiuyon kanla, ta êmêñ a mahamutan hên alwan kaptêgan ya Mangêd ya Habi tungkol kan Apo Jesu-Cristo, ya ampaniwal-an yo.

---

\* **2:2** Ya miligtas kaw gawan ha paniwala yo kan Apo Jesu-Cristo. A yoy nan kailangan palokop ha kaugalian naêñ Israelita hên nanad ha panuli.

**6** Hila man ya ambalayêñ poon lan patêl ha Panginoon ya angkapi-tsi-tsipon ha Jerusalem, ay ayn hilan impahan ya dapat kon itoro. Ayn kangko no hino hila ta pare-pareho kitamo ha arapan ni Apo Namalyari.

**7** Pinaniwal-an la ko ya hiko ay pinili ni Apo Namalyari hên mangitoro hên Mangêd ya Habi kamoyun alwan Israelita. Hi Pedro etaman, ay pinili nan mangitoro kanlan kapareho naêñ Israelita.

**8** Gawan bay, no ay-êmêñ na yan hinawpan ni Apo Namalyari hi Pedro ha pangaapostol na kanlan kapareho naêñ Israelita, ay êmbayro êt, ay hinawpan na ko etaman ha pangaapostol ko kamoyun alwan Israelita.

**9** Kabay hi Santiago, hi Pedro, haka hi Juan ya ambalayêñ poon lan patêl ha Panginoon ya angkapi-tsi-tsipon ha Jerusalem, ay nananggap kannaêñ hên mag-in kalamo la, hên nabalayan la ya ayn kapantag ya ingalo ni Apo Namalyari kangko. Napikahundoan naêñ ni Bernabe ya ihundo ya panoro naêñ kamoyun alwan Israelita, ta hila etaman ay ihundo lay panoro la kanlan kapareho naêñ Israelita.

**10** Pinakihabi lan bêngat kannaêñ ya a naêñ paulayan hilay mangairap kanlan patêl ha Panginoon ya angkapi-tsi-tsipon ha Jerusalem. Mahigla ko etaman hên manyag habayto.

### *Hinabyanan ni apostol Pablo hi apostol Pedro*

**11** Minghan, hên naniraw hi Pedro bayro kannaêñ ha balayan Antioquia, ay arap-arapan ko

yan hinabyanan gawan main yan dinyag ya alwan mangêd.

<sup>12</sup> Ta haton minghan in-utoh kannaên ni Santiago ya ungnoy lalaki, ya Israelita, ya ampaniwala kan Apo Jesu-Cristo. Bayo hila nilumatêng ay am-pangan yay na hi Pedro hên kaaêm lan kapareho yon alwan Israelita. Noa, hên nilumatêng hilay habaytoy in-utoh ni Santiago ay nagpakanawa yan nagdayo hên nagpapawa kanlan kaaêm na, gawan bawal kannaên hên Israelita, hên kiaêm kanlan alwan Israelita. Dinyag nay habayto ta malimo ya hên mahabyanan yan Israelita ya an-ipalêkpêk ya dapat patuli hilay ampaniwala kan Panginoon Jesu-Cristo, no labay la hên madyanan hilan biyay ya ayn angga.

<sup>13</sup> Haka hilay kaatag ya patêl ha Panginoon ya Israelita, ay nanoto kan Pedro, ya waringan a hila kiaêm kanlan alwan Israelita, kabay hi Bernabe ay naamuyot etaman ha pagbabara la.

<sup>14</sup> Hêñ nahêlêk ko ya ampidayo hilay na ha kaptêgan hêñ Mangêd ya Habi tungkol kan Apo Jesu-Cristo, ay hinabi ko kan Pedro ha arapan lan kal-atan, ya wangko, “No hika, ya mihay Israelita, ay a kay nan anhumonol ha ugali naêñ, ay dapat a mon patolukêñ hilay alwan Israelita hêñ humonol.”

*Mag-in kitamo hêñ ayn kasalanan ha hêlêk ni  
Apo Namalyari, gawan ha paniwala tamo kan Apo  
Jesu-Cristo*

<sup>15</sup> Hinabi kina êt kanlan kal-atan hêñ taga-Antioquia, ya wangko, “Hikay ya Israelita, ay alwan nanad kamoyun alwan Israelita.

**16** Êmbayro man, ay muwang naêñ ya a nan aniúmang kana ni Apo Namalyari hên an-itad hên ayn kasalanan ya hinoman gawan ha pamanhumonol la ha Kautuhan ni apo Moises. An-itad na kitamo ni Apo Namalyari hên ayn kasalanan gawan bêngat ha paniwala tamo kan Apo Jesu-Cristo. Hikay man ya Israelita ay ampaniwala kana, ta êmén na kay itad hên ayn kasalanan gawan ha paniwala naêñ kana, alwan gawan ha pamanhumonol naêñ ha Kautuhan.

**17** “Labay-labay tamon mag-in ayn kasalanan ha hêlêk ni Apo Namalyari, hên gawan bêngat ha paniwala tamo kan Apo Jesu-Cristo, noa, wanlan kaatag ya kapareho kon Israelita ya kasalanan kano ya habain, ta a tamo anhonolên ya Kautuhan. No êmbayro dayi, ay hi Apo Jesu-Cristo awud ya ubatan kasalanan tamo. Taganán alwan pêtêg ya habayto.

**18** Ta no muwang tamina ya an-itad na kitamo ni Apo Namalyari hên ayn kasalanan gawan bêngat ha paniwala tamo kan Apo Jesu-Cristo, noa, an-habién tamo ya kailangan tamon honolên ya Kautuhan bayo na kitamo itad hên ayn kasalanan, ay kasalanan ya habayto.

**19** Ta gawan ha Kautuhan, ya a ko kayan honolên, ay namwangan ko, ya hinatolan akinan matsi hên ipapawa kan Apo Namalyari, kabay an-itad kinay sarili kon natsi ha Kautuhan ta êmén ko madyag ya kalabayan ni Apo Namalyari.

**20** Nanad akinan natsi hên kalamo ni Apo Jesu-Cristo ha koros, haka hiya tana ya angkabiyay kangko. Kabay, kaban atsi ko pon kanan hata lawini ko di ha luta, ay ampamiyay ako hên gawan

ha paniwala ko kana, ya Anak ni Apo Namalyari, ya namihalanggo hēn biyay na ha koros gawan ha pamanlugud na kangko.

<sup>21</sup> A ko andaygēn hēn ayn alagá ya ayn kapantag ya ingalo ni Apo Namalyari. Ta no gawan bēngat dayi ha pamanhumonol ha Kautuhan ya pan-itad na kitamon ayn kasalanan, ay a yay na dayi natsi hi Apo Jesu-Cristo.” Habayto ya hinabi ko kanlan taga-Antioquia.

### 3

#### *Mangēd ya paniwala kan Apo Jesu-Cristo kanan pamanhumonol ha Kautuhan*

<sup>1</sup> Hikaw ya taga-probinsyan Galacia, ya ampaniwala kan Apo Jesu-Cristo, ay nanad kaw nan ayn minuwang. Awta naamuyot kaw ha alwan pêtēg? Impamulah kinan mangēd kamoyu no pata natsi hi Apo Jesu-Cristo ha koros.

<sup>2</sup> Pakaihipēn yo ya hinumapat ya kamoyu ya Espiritu ni Apo Namalyari gawan ha paniwala yo ha nagilam yoy tungkol kan Apo Jesu-Cristo, alwan gawan ha pamanhumonol yo ha Kautuhan ni apo Moises.

<sup>3</sup> Nanad a kaw ampangihip. Hēn una ay naniwala kaw kan Apo Jesu-Cristo ya mag-in kaw hēn mangēd ha hawop nan Espiritu ni Apo Namalyari. Awta labay yoy na êt hēn mag-in mangēd ha hēlēk ni Apo Namalyari ha sarili yon dyag?

<sup>4</sup> Naliwaan yoy na lawēh ya kairapan ya dinanan yoy na. Dapat yon ihipēn ya dinanan yo.

<sup>5</sup> Indin ni Apo Namalyari ya Espiritu na kamoyu haka nanyag yan kapapaêpapah ha pibonakan

yo, hēn gawan ha paniwala yo ha nagilam yoy tungkol kan Apo Jesu-Cristo. A na dinyag ya habayto, hēn gawan ha pamanhumonol yo ha Kautuhan ni apo Moises.

**6** Daygēn tamon alimbawa hi apo Abraham. Habaytsi ya impahulat ni Apo Namalyari ya tungkol kana, “Naniwala hi apo Abraham ha hinabi ni Apo Namalyari, kabay intad ya ni Apo Namalyari hēn ayn kasalanan.”\*

**7** Kabay dapat yon maintindihan ya hilay main paniwala kan Apo Jesu-Cristo ay an-itad mantēg kaapo-apoan ni apo Abraham.

**8** Haton lagi êt, ay nakahulat ha Kahulatan ya impahulat ni Apo Namalyari, ya itad na kaw ya alwan Israelita hēn ayn kasalanan, gawan ha paniwala. Habain ya labay habiēn ni Apo Namalyari hēn hinabi na kan apo Abraham ya wana, “Gawan kamo ay ingalwan ko hilay tawo ha balang bansa.”†

**9** Kabay an-ingalwan ni Apo Namalyari hilay main paniwala kan Apo Jesu-Cristo, hēn nanad ha pangingalo na kan apo Abraham ya naniwala ha impangako kana.

**10** Noa, hilay êndat lan mag-in hilan ayn kasalanan ha hēlēk ni Apo Namalyari ha pamanhumonol ha Kautuhan ni apo Moises, ay kalamo lan parusaan na. Ta nakahulat ha Habi ni Apo Namalyari, “Hilay a anhumonol ha balang utoh ya nakahulat ha Kautuhan, ay parusaan hēn ayn angga.”‡

\* **3:6** Genesis 15:6.      † **3:8** Genesis 12:3b, 18:18 haka 22:18.

‡ **3:10** Deuteronomio 27:26.

<sup>11</sup> Muwang tamo ya ayn hinoman ya itad ni Apo Namalyari hēn ayn kasalanan gawan ha pamanhumonol la ha Kautuhan, ta nakahulat êt ha Habi na ya habaytsi: “Hilay an-itad ni Apo Namalyari hēn ayn kasalanan, ay hilay mamiyay gawan ha paniwala la kana.”<sup>§</sup>

<sup>12</sup> Noa, ya pamanhumonol ha Kautuhan ni apo Moises ay marayo ha paniwala kan Apo Jesu-Cristo ta impahulat na êt ni Apo Namalyari ya habaytsi: “Hilay anhumonol ha Kautuhan, ay dyanan hēn biyay ya ayn angga.”\*

<sup>13</sup> Noa, gawan ayn makahonol ha balang mihay Kautuhan, ay hikitamo ay kalamo ha inhumpa ni Apo Namalyari hēn parusaan. Noa, daya ni Apo Jesu-Cristo, ya pinamayad ha parusa hēn kasalanan tamo. Muwang tamo ya nalatngan nay parusa ni Apo Namalyari ta impahulat ya habaytsi ha Kahulatan ni Apo Namalyari: “Nalatngan ya parusa ni Apo Namalyari, hēn hilay pinatsi ha koros.”†

<sup>14</sup> Inhalanggo ni Apo Jesu-Cristo ya sarili na, ta êmēn, ya kangēran ya impangako ni Apo Namalyari kan apo Abraham, ay mipalako etaman kamoyun alwan Israelita, hēn gawan ha paniwala yo kan Apo Jesu-Cristo. Gawan habayto, ay hikitamoy ampaniwala kan Apo Jesu-Cristo, ay parepareho kitamon makatanggap hēn Espiritu ni Apo Namalyari, ya impangako na.

*A nabayo hēn Kautuhan ya impangako ni Apo Namalyari*

---

§ **3:11** Habacuc 2:4. \* **3:12** Levitico 18:5. † **3:13** Deuteronomio 21:23.

**15** Patêl ko ha Panginoon, muwang tamina ya no main lowa kantamo ya main kahundoan ya nipag-permaan, ay ayn nanan hinoman ya makapibayo o makapahan hên habayto. Gilamên yo, ta êmên ya di ya an-ipamwang ko kamoyu.

**16** Hêñ haton lagi, hêñ ayn pon Kautuhan, ay nangako hi Apo Namalyari kan apo Abraham haka kanan miña kanlan mag-in kaapo-apoan na, ya ingalwan na hila. Miha wangko, ta ya habi kaapo-apoan, ya impahulat ni Apo Namalyari ay labay habiên mimiha, alwan kal-atan. Habaytoy miha ay hi Apo Jesu-Cristo, ya kaapo-apoan ni apo Abraham.

**17** Ya labay kon habiên ay êmên di: Ya pangako ni Apo Namalyari kan apo Abraham ha kahundoan la, ya miligtas hila gawan kan Apo Jesu-Cristo, ay a mabayo hêñ gawan bat ha Kautuhan ni apo Moises, ya indin ni Apo Namalyari hêñ pagkalabah hêñ 430 taon.

**18** Ya ingalo ni Apo Namalyari, ay a na an-idin kantamo hêñ gawan ha pamanhumonol tamo ha Kautuhan ni apo Moises. Ha kaptêgan, ay indin ni Apo Namalyari ya ingalo na kan Apo Abraham gawan ha pangako na, alwan gawan ha pamanhumonol ha Kautuhan.

**19** Malyarin main mangotâng: No êmbayro awud, ya main nanan pangako, pata indin êt ya Kautuhan? Indin êt ni Apo Namalyari ya habaytoy Kautuhan ta êmên mamwangan no hino ya kasalanan ha hêlék na, ta habaytoy Kautuhan ay dapat lan honolên, kaban a ya pon nilumatêng ya kaapo-apoan ni apo Israel, ya hi Apo Jesu-Cristo, ya pinangakoan. Habaytoy Kautuhan, ay

impahabi ni Apo Namalyari kanlan anghel na, kan apo Moises.

<sup>20</sup> Noa, ya pamidin nan pangako, ay a na im-padann ha anghel o ha kaatag, ta indiretsa na kan apo Abraham.

### *Main anggaan ya tungkulan hēn Kautuhan*

<sup>21</sup> Kayno êndat yo no ampihalanghang ya Kautuhan ni apo Moises haka ya impangako ni Apo Namalyari. Alwa. Ta no main dayin Kautuhan ya ampam-in biyay ha langit, ay paman-humonol tamo dayi hēn habayto ya pangubatan hēn pan-itad na kitamo ni Apo Namalyari hēn ayn kasalanan.

<sup>22</sup> Noa, nakahulat ha Kahulatan ya impahulat na, ya ayn makaalih ha kapangyarihan hēn kasalanan. Kabay kaapo-apoan man ni apo Abraham o alwa, ay kailangan maubuh kitamon maniwala kan Apo Jesu-Cristo, ta êmēn tamo matanggap ya ingalo ya impangako ni Apo Namalyari.

<sup>23</sup> Bayo impamwang ya main kaligtasan ha paniwala kan Apo Jesu-Cristo, ay atsi kitamo pon ha aypa hēn Kautuhan.

<sup>24</sup> Gawan ha Kautuhan ay namwangan tamo ya makasalanan kitamo haka namwangan tamo ya kailangan kitamon maniwala kan Apo Jesu-Cristo ta êmēn na kitamo itad hēn ayn kasalanan ni Apo Namalyari.

<sup>25</sup> Amêhēn ta ampaniwala kitamina kan Apo Jesu-Cristo, ay ayn kitamina ha aypa hēn Kautuhan.

<sup>26</sup> Kabay hikaw ngan, Israelita man o alwa, ay nag-in anak ni Apo Namalyari, gawan ha paniwala yo kan Apo Jesu-Cristo.

<sup>27</sup> Gawan hikaw ngan, ya binawtismoan gawan ha pakikimiha yo kan Apo Jesu-Cristo, ay mag-in kaugali na, ya nanad imbaro yo yay na.

<sup>28</sup> Israelita kaw man o alwa, ipoh kaw man o alwa, lalaki man o babayi ay main kitaminan pakikimiha, hên gawan ha pakikimiha tamo kan Apo Jesu-Cristo.

<sup>29</sup> No main kaw hên pakikimiha kan Apo Jesu-Cristo ay hikaw ay kaapo-apoan ni apo Abraham haka makatanggap kaw etaman hên impangako ni Apo Namalyari kana.

## 4

<sup>1</sup> Gilamên yo êt ya êmên di ya an-ipamwang ko kamoyu. No main mihay mabandi ya natsi, ya nag mimihay anak, ay hata anak ay kapareho na êt bêngat hên ipoh kaban nanawa ya pon, agyan kana ya bandi hên toa na,

<sup>2</sup> gawan dapat nan honolên ya utoh hên ampanayhay kana, hên angga ha miabot ya ha panaon, ya intakda nan toa na, ya hiyay manalan hên impamana kana.

<sup>3</sup> Embayro kitamo êt, hên a kitamo pon naniwala kan Apo Jesu-Cristo, ta atsi kitamo pon ha aypa hên manan paniwala di ha luta.

<sup>4</sup> Noa, hên nilumatêng ya panaon ya intakda ni Apo Namalyari, ay in-utoh nay Anak na di ha luta, hên ianak hên mihay babayi, haka kaban anhumlay ya ay hinonol nay Kautuhan ni apo Moises.

**5** In-utoh ya di ta êmén na kitamo ialíh ha aypa hén habaytoy Kautuhan ta êmén kitamo mag-in anak ni Apo Namalyari.

**6** Haka gawan hikitamo ay anak nay na ni Apo Namalyari, ay impahapat na kantamo ya Espiritu na, ya impangako ni Apo Jesu-Cristo. Habaytoy Espiritu ay ampam-i kantamo hén karapatan hén baêgên yan, “Tatang ko” hi Apo Namalyari.

**7** Kabay amêhén hikaw ay maának nay na ni Apo Namalyari. Alwa kaw nan ipoh ha aypa hén manan paniwala di ha luta, noa, hikaw ay anak ni Apo Namalyari, ta andyanan na kaw hén hatoy an-idin na ha maának na.

*Naingalwan ni apostol Pablo hilay tagaprobinsyan Galacia*

**8** Hén a yo êt kilala hi Apo Namalyari, ay nanad kaw hén ipoh ya atsi ha lokop lan a angkahêlêk, ya hilay ayn mantêg hén tungkulan.

**9** Noa, amêhén ta kilala yoy na hi Apo Namalyari...o mangêd awud habiên, amêhén ta kilala na kaw na...awta labay yo hén palokop a êt kanlan a angkahêlêk, ya ayn tungkulan? Nanad hén labay yoy na êt hén mag-in ipoh.

**10** Èndat yon mangêd kaw ha hêlêk ni Apo Namalyari no anhonolên yo ya manan ugali ya tungkol ha allo, buwan, panaon, haka taon hén pamagsimba.

**11** Mampotog ako kamoyu, ta kayno nahayang bêngat ya pamagpagal ko kamoyu.

**12** Ampakihabi ko kamoyun mangêd ya tuwarêñ yo ko ya ayn kina ha aypa hén Kautuhan. Kaapo-apoan ako man ni apo Israel, ay nakitad

kina kamoyun alwan kaapo-apoan na, ya a na dinyanan ni Apo Namalyari hēn Kautuhan. Hēn haton atsi ko bahēn kamoyu ay ayn kaw hēn dinyag ya narawak kangko.

<sup>13</sup> Muwang yo ya nakatoro ko kamoyu hēn Mangēd ya Habi hēn haton una, gawan ha hakit ko.

<sup>14</sup> Nakabyat ko man kamoyu gawan ha hakit ko, ay a yo ko kinahulapoan, haka a yo ko kinadamogan. Noa, tinanggap yo ko hēn nanad ha mihay anghel ni Apo Namalyari o hi Apo Jesu-Cristo mismo.

<sup>15</sup> Hadyay kahiglaan yon nanawop kangko hēn hato. Muwang ko ya hēn hato no malyarin bēngat, ay agyan mata yo ay idin yo kangko. Awta alwa kaw nan mahigla kangko amêhēn?

<sup>16</sup> Amêhēn ay an-itad yo kinan kapatsi yo, hēn gawan ha inhabi koy kaptēgan kamoyu.

<sup>17</sup> Hilay ampanoro hēn kaatag ya toro, ay labay-labay la kaw hēn amuyotēn ha alwan pētēg, noa, alwan mangēd ya labay la kamoyu. Labay lan bēngat hēn mipakarayo ya nakēm yo kangko ta êmēn kaw milamo kanla.

<sup>18</sup> Alwan narawak hēn makihawpan no ha ikakangēd ya habayto, haka panay, alwan bēngat no atsi ko bahēn.

<sup>19</sup> Anlugurēn kon maának, nanad akon mihay babayi ya ampanganak ya ampananam hēn hadyay ilab angga ha mag-in nanad ugali ni Apo Jesu-Cristo ya ugali yo.

<sup>20</sup> No atsi ko dayi bahēn amêhēn, ay matanam yoy yagah nakēm ko kamoyu.

*Ya alimbawa ya tungkol kanlan Sara haka ni*

### *Agar*

**21** Hatsi ya mihay kotang ko kamoyun labay paaypa ha Kautuhan ni apo Moises. Angkaintindihan yoy labay habiēn hēn habaytoy Kautuhan?

**22** Nakahulat ha Hulat ni Apo Namalyari, ya hi apo Abraham, ay main loway anak ya lalaki. Ya miha ay anak ni Agar, ya ipoh, haka ya miha ay ha mantēg nan ahawa.

**23** Ya anak na kan Agar, ya ipoh, ay in-anak gawan ha naihipan lan bēngat lan apo Abraham haka hi Sara. Noa, ya anak na kan Sara, ya mantēg nan ahawa, ay na-ianak gawan ha pangako ni Apo Namalyari.

**24** Hatoy loway indo ay kaalimbawaan hēn loway kahundoan. Ya mihay kahundoan ay ubat ha Tawgtug hēn Sinai ha Arabia, ta bayro indin ni Apo Namalyari ya Kautuhan kan apo Moises. Habayto ya kahundoan ay nanad kan Agar, ya ipoh haka ha anak na ya nag-in ipoh.

**25** Hi Agar ay kaalimbawaan hēn Tawgtug hēn Sinai ha Arabia haka ya balayan Jerusalem, gawan habayto ay ampaidyanan hēn kapareho kon Israelita ya nanad ipoh, gawan anhumonol hila ha Kautuhan ni apo Moises.

**26** Noa, hi Sara ya alwan ipoh, ay nanad ha ikalwan kahundoan, ta kaalimbawaan nay bayon balayan Jerusalem, bayro ha langit, haka hiyay nanad indo tamo, ya alwan ipoh ha Kautuhan.

**27** Ta nakahulat ha Kahulatan ni Apo Namalyari ya êmēn di, “Humigla ka ya babayi ya a nagkaanak. Iangaw moy kahiglaan mo, ya hika ya a nakadanas hēn ilab panganak, ta mal-at pon

ya anak hēn babayi ya dinamog, kanan babayi ya nag-ahawa.”

<sup>28</sup> Hikaw ya patêl ko ha Panginoon, hi Isaac ay nag-in anak ni Sara, hēn gawan ha pangako ni Apo Namalyari kan apo Abraham. Hikitamoy nag-in anak ni Apo Namalyari, hēn gawan ha pangako na kan apo Abraham etaman.

<sup>29</sup> Hi Isaac, ya anak ni Sara ay in-anak gawan ha kapangyarihan hēn Espiritu ni Apo Namalyari. Hi Ismael, ya anak ni Agar, ay in-anak hēn gawan ha naihipan lan bēngat lan apo Abraham haka hi Sara. Pinairapan ni Ismael hi Isaac. Èmén êt bayro ya angkalyari amêhêñ.

<sup>30</sup> Noa, nakahulat ha Kahulatan ya impahulat ni Apo Namalyari ya èmén di, “Ipaplag mo ya babayi, ya ipoh, haka ya anak na, ta ya anak na, ay a malyarin makiatag ha bandi ya ipamana na ha anak na ha mantêg nan ahawa.”

<sup>31</sup> Kabay patêl ko ha Panginoon, hikitamo ay alwan nanad anak hēn mihay ipoh, ta hikitamo ay anak nay na ni apo Abraham ha mantêg nan ahawa ya hi Sara.

## 5

### *Paan mag-orong ha pangaipoh*

<sup>1</sup> Imbuhan kitamina ni Apo Jesu-Cristo ha pangaipoh tamo. Kabay pakataniêhêñ yoy nakêm yo haka paan kaw mag-orong ha pangaipoh yo.

<sup>2</sup> Pakagilamên yo. Hiko hi Pablo ya ampaghabi kamoyu ya no magpatuli kaw gawan êndat yon

hikaw ay mag-in mangêd ha hêlêk ni Apo Namalyari, ay a yoy nan mapakinabangnan ya dinyag ni Apo Jesu-Cristo.

<sup>3</sup> Anhabiên kon oman kamoyun lalaki ya malabay hêñ magpatuli, ya no êmbayro ya labay yo, ay kailangan yon honolêñ ya kaganawan Kautuhan ni apo Moises.

<sup>4</sup> Hikaw ya labay hêñ itad hêñ ayn kasalanan ni Apo Namalyari gawan ha pamanhumonol yo ha Kautuhan, ay ampidayo kan Apo Jesu-Cristo haka antalibatokan yoy ayn kapantag ya ingalo ni Apo Namalyari.

<sup>5</sup> Noa, hikay, ay an-êngganan naêñ, ya maiúmang kay kan Apo Namalyari uston itad na kay hêñ ayn kasalanan gawan ha paniwala naêñ kan Apo Jesu-Cristo, haka habaytoy malyari ha kapangyarihan hêñ Espiritu ni Apo Namalyari.

<sup>6</sup> Ta no ampaniwala kitamo kan Apo Jesu-Cristo, ay alway nan maalagá kan Apo Namalyari no tuli kitamo o alwa, ta ya paniwala ya angkahêlêk ha dyag tamo, ya main pamanlugud ay yabay ya maalagá kana.

<sup>7</sup> Hêñ hato ay anhumonol kaw ha kaptêgan ya tungkol kan Apo Jesu-Cristo. Hinoy namagulon nakêm yo ta pinatgênan yoy pamanhumonol yo ha kaptêgan?

<sup>8</sup> A ya manyag hêñ êmbayro hi Apo Namalyari, ya nanagyat kamoyu hêñ maniwala kan Apo Jesu-Cristo.

<sup>9</sup> Kaillag kaw ta êmên a la kaw maamuyot, ta habaytoy alwan pêtêg ya toro la, ay nanad ha pampaalsa kanan hata kahabian, ya wana, “Ya pêrad ya pampaalsa ya pinakigawgaw ha kal-atan

arina ay ampakapaalsa hēn habayto ngan.”

<sup>10</sup> Êmbayro man, ay gawan ha pakikimiha tamo kan Panginoon Jesu-Cristo, ay angkasigurado ko ya honolēn yoy kaptēgan. Angkasigurado ko etaman ya parusaan ni Apo Namalyari hilay ampagulo kamoyu.

<sup>11</sup> Hikaw ya patêl ko ha Panginoon, main kaatag ya ampaghabin ya an-itoro ko pon ya kailangan hēn patuli. No an-itoro ko ya kailangan hēn patuli, pata angga amêhēn ay ampairapan la ko? No êmēn bayro, ay a dayi mam-in yagah kanla ya pangitoro ko hēn tungkol ha pangamatsi ni Apo Jesu-Cristo ha koros.

<sup>12</sup> Ya labay ko kanlan habain ya ampamagulo hēn nakêm yo, ay magpakapon hila tana.

<sup>13</sup> Hikaw ya patêl ko ha Panginoon, hinagyat kaw ni Apo Jesu-Cristo hēn mag-alîh ha aypa hēn Kautuhan. Noa, paan kaw manyag hēn nangarawak ya kalabayan hēn lawini gawan bêngat ha ayn kaw ha aypa hēn Kautuhan. Noa, dapat miyahawop kaw hēn main pamanlugud.

<sup>14</sup> Gawan ha angkaboo ya kaganawan Kautuhan ni Apo Namalyari ha mimihay utoh, “Lugurêñ moy kapareho mo hēn nanad ha pamanlugud mo hēn sarili mo.”

<sup>15</sup> Noa, no ihundo yoy pamipapatsi yo, ay mahira ya pamilalamo yo.

*Ya pamimiyay ha kapangyarihan nan Espiritu ni Apo Namalyari*

<sup>16</sup> Habaytsi ya aral ko kamoyu: palokop kaw ha Espiritu ni Apo Namalyari ta êmêñ a kaw

makadyag hēn nangarawak ya kalabayan lawini yo.

<sup>17</sup> Ta ya nangarawak ya kalabayan hēn lawini, ay halanghang ha kalabayan hēn Espiritu ni Apo Namalyari, haka ya kalabayan hēn Espiritu ni Apo Namalyari, ay halanghang etaman ha nangarawak ya kalabayan hēn lawini. Habaytoy lowa ay ampihalanghang. Kabay a yo madyag ya labay yon daygēn.

<sup>18</sup> No nagpalokop kaw ha Espiritu ni Apo Namalyari, ay ayn kaw na ha aypa hēn Kautuhan.

<sup>19</sup> Mabalayan ya nangarawak ya dyag hēn lawini, hēn nanad ha pamanakēh ha alwan ahawa, pamanyag hēn kaatag êt ya kagatēan, haka ya panay hēn pamanyag hēn habaytoy karêmêkan ya kapaparêng-êy,

<sup>20</sup> ya pamagsimba ha alwan pêtêg ya diyos, manggamit hēn dangá, humêmêk, pamipapatsi, pamangimon, tulawêñ, mag-in matalareh, patatayak, pamigagampi,

<sup>21</sup> kariyaañ, pamaglahing, panay makilahingan, haka kaatag êt ya dyag ya êmén bayro ya karawakan. Omanêñ kon habiêñ ya hinabi ko kamoyu hēn hato, ya hilay ampanyag hēn êmbayro ay a makapakilamo ha pamanlokop ni Apo Namalyari.

<sup>22</sup> Noa, no atsi kantamo ya Espiritu ni Apo Namalyari, ay mag-in kitamon malugud, mahigla, mapatêkbék ya nakêm, mapagtêeh, maingaloêñ, mapaypaniwal-an,

<sup>23</sup> maaypay nakêm haka mapaggipil ha sarili. No êmén di ya ugali tamo ay alwan bawal ha patakaran ya dyag tamo.

<sup>24</sup> Hikitamo ya main pakikimiha kan Apo Jesu-Cristo ay ahina hēn manyag hēn nangarawak ya kalabayan hēn lawini ta nanad impako tamina ya habayto ha koros hēn kalamo ni Apo Jesu-Cristo.

<sup>25</sup> Dinyanan na kitamon Espiritu ni Apo Namalyari hēn bayoy biyay, kabay dapat palokop kitamina kana.

<sup>26</sup> Paan kitamon magmahlay, paan mamahuluk hēn miha ta miha, haka paan miriridyaan.

## 6

### *Dapat miyahawop*

<sup>1</sup> Hikaw ya patêl ko ha Panginoon, no main kamoyu ya nakadyag hēn kasalanan, ay hikaw ya ampaakay ha Espiritu ni Apo Namalyari, ay aralan yo ya hēn maaypa ya nakêm ta êmên ya miúmang kan Apo Namalyari. Haka kaillag kaw, ta kayno hikaw êt ya matukso.

<sup>2</sup> Dapat miyahawop kaw ta ha pamihahawop yo ay mahonol yoy utoh ni Apo Jesu-Cristo.

<sup>3</sup> No main kamoyu ya êndat na ya hiyay mangêd ha kaatag, ay anlokoén nay sarili na.

<sup>4</sup> Dapat pakaihipêñ hēn balang miha ya sarili nan dyag, ta no mangêd, ay malyari yan humigla. Paan iparis ya dyag na, ha dyag lan kaatag,

<sup>5</sup> ta ya balang miha ay main yan sarilin dyag ya dapat nan daygêñ.

<sup>6</sup> Ha hinon angkakwa nan antoroan, ay dapat atagan nay ampaypamwang kana hēn Habi ni Apo Namalyari.

<sup>7</sup> Paan yon lokoêñ ya sarili yo. Hi Apo Namalyari ay a maloko hên hinoman. No hinoy intanêm tamo ay habayto êt ya popolên tamo.

<sup>8</sup> Hilay mapanyag hên karawakan kalabayan hên lawini la, ay makakwa hên kaparusaan ya ayn anggaan ha impiyerno. Noa, hilay ampanyag hên kalabayan hên Espiritu ni Apo Namalyari ay makakwa hên biyay ya ayn anggaan ya an-idin nan Espiritu ni Apo Namalyari.

<sup>9</sup> Paan kitamon humawa ha pamanyag hên kangêran, ta lano ha lumatêng ya allo, ay main kitamon matanggap no a kitamo anhumawa.

<sup>10</sup> Kabay kaban angkabiyyay kitamo pon ay manyag kitaminan kangêran ha balang miha, lalon-laloy na kanlan patêl tamo ha Panginoon.

*Tawlin aral ni apostol Pablo kanlan taga-Galacia*

<sup>11</sup> Hatsi ya angkahêlêk yo ya mangahlay ya letra ay hiko ya nanulat hên hatsi ha mantêg kon gamêt.

<sup>12</sup> Hilay kapareho kon mánoro ya Israelita ya ampanapol hên pamandayêw kanlan kapareho naêñ Israelita, ay ampamatoluk kamoyu hên patuli kaw. Andaygên lay habayto ta êmên a hila pairapan, hên nanad kanlan kaatag ya ampaniwala ya hukad ana ya pangamatsi ni Apo Jesu-Cristo ha koros, haka ahina kailangan patuli.

<sup>13</sup> Tinuli hila man, ay a hila anhumonol ha kaatag ya Kautuhan. Noa, labay lan patuli kaw, ta êmên hila main maipagmahlay ha kapareho naêñ ya Israelita, ya hikaw ay napahonol lan magpatuli.

<sup>14</sup> Noa, hiko ay ayn akon kaatag ya anipagmahlay, no alwan ya pangamatsi ni Panginoon Jesu-Cristo ha koros. Gawan ha pangamatsi na, ay ayn nanan alagá kangko ya maalagá kanlan a ampagpalokop kan Apo Namalyari. Haka ha hêlêk la kangko ay ayn akon alagá.

<sup>15</sup> Kantamon main pakikimiha kana, ay alwan maalagá no tinuli kitamo o ahê. Ya maalagá ay binayo ya ugali tamo.

<sup>16</sup> Hikaw ya anhumonol ha toro ko, ay mag-in dayin mapatékbék ya ihip yo ta hikaw ay mantêg hén anak ni Apo Namalyari. Dayi ingalwan na kaw ngan.

<sup>17</sup> Ampakihabi ko ya paubat amêhén, ay a kinan papotogén ya miha man kamoyu, ta hukad ana kangko ya hikoy nangapipiyatan gawan ha pamanhumonol ko kan Apo Jesu-Cristo.

<sup>18</sup> Hikaw ya patêl ko, dayi ingalwan kaw ngan ni Panginoon tamon Jesu-Cristo. Amen.

## **Ya habi ni apo namalyari: Bayon tsipan - Ayta Mag-antsi New Testament in Ayta, Mag-antsi**

copyright © 2006 Wycliffe Bible Translators, Inc.

Language: Mag-antsi Ayta (Ayta, Mag-antsi)

Translation by: Wycliffe Bible Translators

Contributor: Wycliffe Bible Translators, Inc.

### **Copyright Information**

© 2006, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789718260654

### **The New Testament**

in Ayta, Mag-antsi

**© 2006, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-03-17

---

PDF generated using Haiola and XeLaTeX on 18 Apr 2025 from source files  
dated 29 Jan 2022

d2289d90-e8af-5f04-a1e1-312fd0921aff